

每週經課朗誦經文(巴克禮漢羅/教羅)2014/10/19

共同經課 - 1 出埃及記三十三章十二節~二十三節

12 摩西對耶和華講：看 ah，你對我講，將 chit-ê 百姓 chhoā 上去，總是無 hō我知你 beh 差 chī-chūi kap 我相 kap 去。只有講：我用名揀召你，你 tī 我 ê 面前也得 tiòh 恩典。13 我 taⁿ 若 tī 你 ê 面前得 tiòh 恩典，求你將你 ê 路指示我，hō我 bat 你，thang tī 你 ê 面前得 tiòh 恩典；你 tiòh siàu 念 chit 族是你 ê 百姓。14 耶和華講：我 beh 親身 kap 你去，hō你平安。15 摩西對伊講，你若無親身 kap 我去，就 m̄-thang chhoā 阮 tùi-chia 上去。16 Tùi 怎樣會知，我 kap 你 ê 百姓 tī 你 ê 面前得 tiòh 恩典？kiám m̄是 tùi 你 kap 阮相 kap 去，hō我 kap 你 ê 百姓 tī 地上萬百姓有分別 mah？17 耶和華對摩西講：你所講 chit-ê 事，我也 beh 做伊；因為你 tī 我 ê 面前得 tiòh 恩典，koh 我用名揀召你。18 伊講：求你 hō我看見你 ê 榮光。19 伊講：我 beh hō我一切 ê 恩惠經過你 ê 面前，也宣布耶和華 ê 名 tī 你 ê 面前。我 beh 施恩 tī 我所施恩 ê，我 beh 憐憫 tī 我所憐憫 ê。20 Koh 講：你 boē 能看我 ê 面，因為無人會看見我也能活。21 耶和華講：看 ah，近我 chia 有所在，你 tiòh khiā tī 石磐頂；22 當我 ê 榮光經過 ê 時，我 beh kā 你 hē tī 石磐縫內，用我 ê 手遮你；thèng 候我過去；23 然後我 beh kiu 我 ê 手 tò-tng，你就會看見我 ê ka-chiah 後；總是 boē 得 thang 看見我 ê 面。

共同經課 - 2 詩篇九十九篇

1 耶和華做王，列邦 tiòh ngiàuh-ngiàuh-chhoah；伊坐 tī ki-lō兵，地 tiòh 搖動。2 耶和華 tī 錫安做大；伊 poāⁿ 過 tī 萬百姓 ê 頂面。3 In tiòh o-ló 你大 koh thang 驚畏 ê 名；伊是至聖。4 王有氣力，歡喜公平；你 hō正直堅固。Tī 雅各中行公平 kap 義理。5 Lín tiòh 尊重耶和華咱 ê 上帝，Tī 伊腳踏椅 ê 頭前跪拜；伊是至聖。6 Tī 伊 ê 祭司中，有摩西 kap 亞倫，Tī 求叫伊 ê 名 ê 人 ê 中間，有撒母耳；In 求叫耶和華，伊就聽 in。7 伊 tī 雲柱 ê 中間對 in 講話；In 遵守伊干證 ê 話，kap 伊所賞賜 in ê 律法。8 耶和華阮 ê 上帝 ah，你有應 in；你雖然照 in ê 所行報應 in，Iáu-kú 你是赦免 in ê 上帝。9 Lín tiòh 尊重耶和華咱 ê 上帝，Tī 伊 ê 聖山跪拜；因為咱 ê 上帝耶和華是至聖。

共同經課 - 3 帖撒羅尼迦前書一章一節~十節

1 保羅 kap 西拉以及提摩太，phoe 寄 hō帖撒羅尼迦人 ê 教會，就是 tiàm-tī 父上帝 kap 主耶穌基督 ê；願 lín 得 tiòh 恩典平安。2 阮為 tiòh lín 眾人常常感謝上帝，tī 祈禱 ê 中間 siàu 念 lín；3 tī 上帝咱 ê 父 ê 面前，長長 siàu 念 lín 有信就行做，有仁愛就 tiòh 磨，有 òng 望咱 ê 主耶穌基督就吞忍。4 上帝所疼 ê 兄弟 ah，阮知 lín ê 受揀選。5 因為阮 ê 福音到 tī lín，m̄是在 tī 講話 nā-tiāⁿ，是在 tī 權能，在 tī 聖神，kap 堅固 ê 信；親像 lín 知阮 tī lín 中間，為 tiòh lín 來成做甚麼等號 ê 人。6 Koh lín 已經 tī choē-choē 苦難，用聖神所賞賜 ê 歡喜，來承受道理，就學阮也學主，7 致到 lín 做馬其頓、亞該亞 lóng 總信 ê 人 ê 模樣。8 因為主 ê 道理 tùi lín 傳出，m̄-nā tī 馬其頓 kap 亞該亞 nā-tiāⁿ，就是 lín òng 上帝 ê 信已經 tak 所在報揚，致到阮 m̄免講甚麼。9 因為 in 家已報明講阮到 lín 中間是甚麼款，也 lín 怎樣有離開偶像，歸 tī 上帝，來服事活 koh 真 ê 上帝；10 也 thèng 候伊 ê Kiáⁿ tùi 天落來，就是伊 tùi 死人中 hō伊 koh 活 ê 耶穌，是 hit-ê 拯救咱出將來 ê 受氣 ê。

共同經課 - 4 馬太福音二十二章十五節~二十二節

15 Hit 時法利賽人去參詳，看 thang 怎樣就伊 ê 話來 tauh 伊。16 就差 in ê 學生 kap 希律黨就近伊講，先生 ah，阮知你是真實，koh 用真實將上帝 ê 路教示人；你也無掠甚麼人做要緊，因為你無看人 ê 外貌。17 納稅 hō該撒合宜 á 無？你 phah 算怎樣？請 kā 阮講。18 耶穌知 in ê pháiⁿ，就講，假好 ê 人 ah，啥事試我。19 用納稅 ê 銀 á hō我看。In 就 thèh 一個銀 á hō伊。20 耶穌 kā in 講，Chit-ê 像(siōng)kap 號是 chī-chūi？21 kā 伊講，該撒。伊就 kā in 講，Án-ni，lín tiòh 將該撒 ê 物納 hō該撒，將上帝 ê 物納 hō上帝。22 In 聽見就奇怪，離開伊去。